

«Lavurar davos ils mirs è prescrit»

Nova praschun serrada Cazas Tignez

DA GION NUTEGN STGIER / ANR

■ **Il chantun è alla tschertga da manaschis da l'economia e da l'industria che daventan partenaris da la nova praschun serrada ch'è en construcziun en il Grischun central. Interpresas han la chaschun da laschar far ils delinquents singulas lavurs, tut tenor abilitad.**

Actualmain vegn construida la nova praschun Cazas Tignez en proxima vischinanza dal stabiliment giudizial avert Realta. Il mument che la praschun vegn averta po ella occupar fin 152 praschuniers en sias localitads da mastergn. Il chantun investescha per quella nova praschun 119 milliuns francs e da quels surpiglia la confederaziun 33 milliuns francs. La praschun saja per la regiun er da gronda muntada economica, ha ditg ier cusseglier guvernativ *Christian Rathgeb* a Cazas. Ella duai esser in surpli da lavur per il Grischun central cun er porcher 80 novs posts da lavur.

Tenor lescha

Per l'occupaziun dals bunamain 100 praschuniers che n'hajan betg lavur en l'edifizi saja il chantun dependent d'interpresas che laschian far ils praschuniers lavurs tenor giavisch, capaciad ed er savida, ha punctuà Rathgeb. Sco quai che *Ines E. Follador-Breitenmoser*, la directura da la nova praschun a Cazas Tignez, ha ditg sajan ils praschuniers obligads tenor lescha da lavurar davos ils mirs da la

praschun. Prescrit saja lura er quantas uras ch'i vegnia lavurà en in di ed er quantas uras che mintgin haja paus. Per quai sajan las novas localitads e lavuratori er impurtants.

Da gronda impurtanza

Quels sajan avant maun uschia che las interpresas che daventan partenaris da la praschun hajan intgins avantatgs cun laschar far ils praschuniers lavurs adattadas

e tenor forza. Occupar ils praschuniers saja da grond'impurtanza sociala per il mintgadi dad els. La surveglianza dals praschuniers hajan ils manaders dals lavuratori che sajan er persunas dal rom

quai che pertutga il cumportament ed il tractar ils delinquents. Las pussaivladads da produziun en ils novs lavuratori sajan fitg vastas, ha ditg *Mathias Fässler*, il manader da l'Uffizi per l'execuziun giudiziala dal Grischun.

Bleras incumbensas

En l'execuziun da chastis sto la lavur ademplir bleras funcziuns. Emprerder ed exercitar sin ils champs professiunals e pedagogics gidan a rinforzar la fidanza en las atgnas abilitads dals praschuniers e gidan ad activar lur potenzial individual. Las abilitads che vegnan promovidas uschia permettian da meglierar las schanzas d'ina vita senza chastis sunter la relaschada. In'incumbensa da produziun per la praschun Cazas Tignez gida ultra da quai a reducir ils custs da la detenziun. Las pretensiuns economicas da la praschun Cazas Tignez s'orienteschan – sco en ils manaschis da l'economia privata – als basegns dal martgà. Ils pretschs per ils products e per ils servetschs sa drizzan tenor ils products e tenor ils servetschs cumparegliabels da l'economia libra. Ils manaschis industrials da la praschun Cazas Tignez sa chapeschan sco partenaris e betg sco concurrenza da l'economia indigena ed èn pia zunt interessads per eventualas cooperaziuns. Quai cuntegna er la pussaivladad da pudair producir e fabritgar en pitschnas quantitads e quai per interpresas da l'entir chantun.



Il chantun ha infurmà ier en tge furma ch'interpresas grischunas han la pussaivladad da collavurar cun la praschun sco partenaria: Cusseglier guvernativ Christian Rathgeb, Mathias Fässler, manader da l'uffizi per l'execuziun giudiziala, Ines E. Follador-Breitenmoser, directura da la nova praschun e Nina Albin, manadra lavur ed economia (da san.).

FOTO G. N. STGIER